

Date – 18/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Vawiin hi Kristian te ni pawimawh Good Friday a ni a, khawvel hmun dangte ang bawkin Mizoramah pawh kohhran ten urhsun takin hun an hmang ang.
2. Pharmacy Council of India President, Dr. Montu Kumar M Patel chuan Mizoram sawrkar in hmunhma a ruahhman sak thei a nih chuan, Central lam atanga skill development a training-na hmun sakna tur tum an huam tih a sawi.
3. Union Home Minister Amit Shah-a chuan sipaite inpekna leh huaisenna avangin vawiin thlengin ram a la him a ni tih a sawi.
4. All India Institute of Medical Sciences (AIIMS), New Delhi chu khawvela damdawiin tha tehnaah 97-na a ni.

<><><>

GOOD FRIDAY

Vawiin hi Kristian te ni pawimawh Good Friday a ni a, khawvel hmun dangte ang bawkin Mizoramah pawh kohhran ten urhsun takin hun an hmang ang.

Nizan khan Kohhran hrang hrang te chuan Kohhran Inkhawm an nei a, Presbyterian leh Baptist bakah kohhran thenkhat chuan Lalpa zanriah Sacrament kilin Kohhran Zaipawl te an zai a, kohhran thenkhat chu inkhawm banah Pathian fakin an zaikhawm chhunzawm bawk.

(SFX)

Good Friday-ah hian Presbyterian Kohhran chuan a inang tlangin thupui hrang hrang - 'Isua chung a rorelna', 'Pathian Kalsan nun' tih leh 'A thihna chu kan thihna' tih te an ngaithla ang a. Baptist kohhran chuan Midang tidama mahni inti dam thei lo tih an ngaithla thung ang a, tualchhung kohhran ten mahni remchan angin hun an hmang bawk dawn a ni.

Catholic Kohhran te chuan nimin khan Ningani thianghlim chu urhsun taka hmangin he hunah hian Isua'n a zirtirte nen zanriah hnunung an kilna chhui tharin Eucharist thianghlim buatsaih a nih bakah Isua'n a lo zirtir angin Kesil Rawngbawl na neih a ni a. He hunah hian Puithiam te chuan kohhran chung atanga mi 12 thlanchhuah te ke an silsak a, hei hian Isuan hmangaihna leh inngaihtlawmna a zirtir kha a entirna leh ti ve tura a tihna chhunzawmna a ni a, venpui na hun hman chhunzawm a ni. Good Friday hi urhsun takin an

hmang dawn a. Isua'n kalvari tlang pana kross a putna leh a kawng zawh kha hriatreng nan Kraws Kawngzawhna an nei bawk dawn a ni.

Vawiin hi Good Friday a nih vangin Mizoram hmun dang ang bawkin Kolasibah chuan dawr leh sumdawnna hmun te khar a ni a, sorkar pisa, Zirna In, Bank leh sorkar hospital OPD te pawh khar a ni ang.

<><><>

CYCLONE REMAL

Nikum Cyclone Remal avanga Hlimen mipui chhiat tawh chhungkuate awmna tur chu, Department of Disaster Management & Rehabilitation (DM&R) Minister Prof. Lalnilawma hovin nimin khan ngaihtuah a ni.

Chhiattawh chhungkaw thenkhat te hi Hlimen a Transport Department hmunah chen lailawh tir mek an ni a, he Transport Department hmun hi Department lam chuan luah a, hnathawhna atana an mamawh tak avangin, chhiat tawh chhungkuate awmna tur hi ngaihtuah a ngai ta a ni.

He meeting-ah hian DM&R Dept. atangin Secretary Pi Lalrinzuali, Director Pu. Lalrengpuia leh DM&R official te an tel a. Transport Dept aiawhin Additional Secretary Pu Lalchhanhima leh official te, Aizawl DC Pu Lalhriatpuia leh DC office-a thawh officer te bakah AMC Ward-19 Corporator Dr .Malsawmtluangi chu an tel a ni.

<><><>

PHARMACY COUNCIL OF INDIA

Pharmacy Council of India President, Dr. Montu Kumar M Patel chuan Mizoram sawrkar in hmunhma a ruahhman sak thei a nih chuan, Central lam atanga skill development a training-na hmun sakna tur tum an huam tih a sawi.

Aizawl Press Club-ah chanchinbumite nimina a kawmnaah he thu hi sawiin Dr Monty Kumar Patel chuan Pharmacy Council-in thuneihna sang tak a nei a, state council pawh in pharmacist te training leh skill development neih pui reng a tum a ni a ti a. Skill development a awm theihna turin Mizoram Health Minister a sawipui bakah, Mizoram sawrkar in hmunhma a ruahhmansak theih chuan Central lam atanga a training-na hmun sakna tur tum an huam thu he hun ah hian a sawi.

Dr Monty Kumar Patel chuan Mizoram chhunga Pharmacist post sanction 122 awm chungin pharmacist post ngheta awm mi 25 chiah lak an ni chu pawh a tih thu sawiin, Sawrkar hospital hrang hrangah pharmacist thawktu an in daih lo hle a ni a ti a.

Mizoram chhunga Drugs hmansual leh damdawi tha lo atam lutuk te chu veiawm a ti a, Drugs khuahkhirhna a that lehzual theih nan Food and Drug Administration hnuaia Drug Control Officer sanctioned post 12 a awm laia post nga chiah lak a nih chu pawh a ti in, post ruak tehi hnawh khah vat theih nise a duh thu a sawi bawh.

RIPANS Department of Pharmacy Head, Dr H. Lahlhenmawia chuan dan hnuaiah Pharmacist te kut ngei atang chauha damdawi dawn theih a nih bakah damdawi an pek rualin a ei dan tur leh side effect awm thei thlengin a lei tute

chu an hrilh thin tur a ni a. Dan kengkawh tur hian Mizoram State Pharmacy chuan hma a lak mek thu leh Pharmacist te chu damdawi dawra thu vek tura hma an lak thu a sawi a. Pharmacist te damdawi dawra an thut thlap chuan doctor chawh chin chiah damdawi an pek thin dawn avangin drugs ngawl veina intanna pawh a kiam vek a rin thu Dr H. Lalhlenmawia chuan a sawi.

<><><>

ASI

Archaeological Survey of India (ASI) chuan kumin February ni 25 atanga March ni 1 chhunga Mizoram khaw hrang hranga pipute sulhnu zawna-village to village survey an neihnaah pipute sulhnu lung ker an hmu chhuak a. Heng lungker te hi Khawzawl, Chawngtlai, Saitual, Serchhip leh Champhai district ami te a ni a, mihring lem te, Sial lu lem te, Sangha lem te ker a ni.

Assistant Superintendent Archaeologist Salam Shyam Singh, Assistant Archaeologist K. Lalrinchhani leh a team te chuan he lung ker hmuhchhuah hi Mizo te tan thil hlu tak a ni a, Mizo hnam rohlu Mizoten Mizoram an luahna ti nghet tu a ni an ti. He lung ker leh lung kerna hmun hi humhalh dan tur ruahmanna ASI lam chuan a la siam dawn a ni.

<><><>

PMMSY

Fisheries Department Saitual chuan PMMSY hnuaia Component pahnih Sangha dil khuah tanpuina leh lei-leta sangha khawitute tanpuina chu nimin khan mi 80 te hnenah a sem chhuak.

He hunah hian PMMSY scheme hrilhfiahna te, dil enkawl dan leh sangha sawngbawl dan te chu technical mithiam te hmangin training pek nghal an ni a, beneficiaries-te hnena atanga zawhna te District Fisheries Development Officer, Pi Zomuansangi chuan chhangin, hlawkthlak tak leh inpawhtlang taka hun hman a ni.

DFDO Pi Zomuansangi chuan tanpuina dawngtute chu tihtakzetna thinlung pu a thawk turin a fuih a, thahnemngai taka he scheme tihlawhtling turin kalkhawm te a chah. Saitual District chhungah Sangha intodelh ngei thei tura thawk rim turin a chah bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

AMECC

Mizoram CSS Employees Coordination Committee hruaitute chuan nimin khan Adviser to Chief Minister Pu Lalmuanpuia Punte hmu in an harsatna tawhte a sawipui.

He hunah hian All Mizoram CSS Employees Coordination Committee hruaitute chuan an dinhmun leh an harsatna tawhte an sawifiah a, Mizoramah CSS hnuaia lak sawrkar hnathawk 10,000 chuang an awm thu sawiin hun rei tak ata tawh an dinhmun tha zawka siam a nih theih nan an beih tawh thin thu an sawi a, sawrkarin inhawng taka indawr tawn theihna kawng a buatsaihsak chu lawmawm an tih thu sawiin, sawrkar chungah pawh beiseina sang tak an neih thu an sawi.

Pu Lalmuanpuia Punte chuan Chief Minister-in CSS hnuaia hnathawkte a ngaih pawimawh thu sawiin an nawrhna sut turin All Mizoram CSS Employees Coordination Committee hruaitute a ngen a, an harsatna tawhte pawh Chief Minister a sawipui tur thu leh anmahni pawhin Chief Minister an hmuh theih hun remchang siam a nih tur thu a sawi a, an harsatna tawhte chinfel a nih theih nan nawrh an kalpui lai sut a tha taka sawi ho a pawimawh thu a sawi, All Mizoram CSS Employees Coordination Committee hruaitute pawhin sawrkarin an harsatnate a ngaih pawimawhsak a inbiakna hun a ruahman avanga lawmthu sawiin boruak tha tak hnuaiah an inkawm a ni.

All Mizoram CSS Employees Co-ordination Committee te hian April ni 15 atang khan Pen down strike an kalpui tan a, nimin khan Pendown Strike tawp ni niin AMCECC Pen down Strike hian nghawng a ngah hle a, Education dept. hnuaia sikul 400 chuangah zirna kalpui theih a ni lova, Mid day meal naupang ten an dawng thei lo a, lehkhabu sem leh zirna kaihhnawih dang pawh engmah kalpui theih a ni lo a, Sawrkar office hrang hrang, CSS hnathawk te tam naah chuan hna mumal thawh theih a ni lo a ni.

<><><>

AR

Assam Rifles te chuan nimin khan Siaha District chhunga awm Lungpuk khuuah ruahtui khawl chungchang zirtirna an nei a, he hunah hian tualchhung mi 25 pungkawmin hlawk taka hun hman a ni.

Ruahtui khawl inzirtirna hunah hian tui pawimawhna leh a dah khawl mai bakah, tui luangral tur ven leh a hman nawn theih dante inzirtir a ni a, tui khawl chuan khawtlang nunah nghawng tha neiin thing phun chawm leh enkawl thlengin a pui thei a, hemi kawngah hian mipui ten mawhphurhna sang tak an neih thu zirtir an ni.

Assam Rifles te hian India hmar chhak mipuite nen thawhhona tha tak hnuaiah vantlang tana pawimawh hrang hrang an ti thin a, mihringte leh an chhehvel a chengte humhalh kawngah pawh nasa takin hma an la thin a ni.

<><><>

UNION HOME MINISTER

Union Home Minister Amit Shah-a chuan sipaite inpekna leh huaisenna avangin vawin thlengin ram a la him a ni tih a sawi. Rajasthan-a Sirohi district-a Brahma Kumari headquarter-a awm sipaite hmaah he thu hi sawiin Pu Shaha chuan khawvawt tak vurin a khuh karah te leh thlaler hmun hreawm takah sipaiten theihtawp chhuaha ram an venhim avangin ram a him phah a ni a ti bawk.

Nimin vek khan Union Home Minister Amit Shah-a chuan CRPF dincham vawi 86-na Madhya Pradesh-a Neechmuch-a lawmnaah natum March

ni 31 hmain ramchhunga Naxal helna tih reh vek a ni ang tih a sawi a. Pu Shaha chuan Naxal helna ti reh tura beihnaah CRPF te an thawk tha hle tih a sawiin CRPF te huaisenna ropui tak avangin Naxal helna hi ramchhung ata nuai reh vek a ni dawn tih a sawi a. Pu Shah-a chuan CRPF Cobra batallion ten Naxal awmlohnaa ram siam tumnaah hna ropui tak an thawk a ni a ti bawk.

Union Home Minister hian CRPF ram tana nun hlante hriatrengna hun a hmang bawk a. Sipai martar chhungte chu chhuanawm a tih thu a sawi bawk a ni.

<><><>

AIIMS

All India Institute of Medical Sciences (AIIMS), New Delhi chu khawvela damdawiin tha tehnaah 97-na a ni. Newsweek leh Statisa ten khawvel puma damdawiin tha tehna an siam World's Best Hospitals 2024 ranking an siamah AIIMS chu damlo enkawlina tha tak leh damdawi lama zirbingna an kalpui that avangte, man tlawm zawka mi maktaduai chuangin enkawlina an dawn theih avangin he dinhmunah hian dah an ni. AIIMS, New Delhi bakah hian Chandigarh-a Postgraduate Institute of Medical Education and Research (PGIMER) chu 228 na a ni bawk.

<><><>